

Kórósía Ebeq sáhnsahwe ahtebé ehwehne.

Kórósía suwahpeqme Esia marákórápéq kowe. Mó kegá Kórósía suwahpeqte ké Sísá éhweh teriuwara mibeqté kéga Sísansabé aiq pútare atówe. Anehe mó kegá péhe éhwéh síwáhnoruwana Poraga mina irena mah pahsíépéq ahqáho aritena aiq pútaq ehweh síwáhnorúwe. Wega mahraue síwáhnoréna, Sísá Karáhéga moke kéh náneq mirarena webataq ite kaweraitena ite kiotaiki Wahnáh mía miaire. Minayabe wene aiq pútaq sansá ambubu atawéq tábúsoqme sehgióro éna Poraga mah pahsí sehiranúwe.

Poraga Kórósía suwahpeqte ké siu pahsíc.

¹ Kórósía suwahpeqte kéó, íné Porane páhsi sáhnsahwe tagahro. Sísá Karáhé éhweh kosíwáhnorinkeheéna Manikánka omaq intena eqmaq núwátáire. Ínéreq Tímótireqka Sísá Karáhéne arambehriúya anité úye.

² Itewe Sísá Karáhéne sansá kawerue ambubu atíáhwe. Maniká Iteriboga ite séhréh aitena iru ukiq itankéhe.

*Kórósía kegá Sísansabé aiq pútare atera kéro
ehwehne.*

³ Maniká we Sísá Karáhé itene Wahnahne abowáe. Itensabé púreraityataq Manikánsabe kaweróne ateta ahriahri iwíáh iwíáh atoye.

⁴ Sísá Karáhéne sansá aiq kawerue ahtebeq tábúsoqme sehgieq ómi Manikáne animárínsabé irutaboirowe. Minayabe ireta itensabé púreraityataq Manikánsabe kaweróne ateta ahriahri iwíáh íwíáh atoye.

⁵ Aiq pútaq ehwéhmé kaweq ehwéh téh írótaq íópeq oga mérapeq awaq mianeheqmuné íwíáhéq irutaboirowe. Irutaboironsabé itega Sísane sánsá miraéq we tagariáh keyábé irutaboirowe.

⁶ Manikánka séhréh aitaahráhi ehwéh írátótaq aiq pútare atera ahtebarowe. Minayabe mi tanáhráq Manikánka kaweraitáaire. Sísá tagariáh kégá mah kehiná kéhíná mah kawéq éhwéh teri terinowana Manikánka íráh ké moq kawerarítéhre.

⁷ Mi kawéq éhwéhmé ite Kórósia ke íwáhnorurai anímé Épárasi Sísá Karáhéne arambehri aní ména itereq arambehrire. Arambehriraq wensabé irutaboirúne. Iteba íre pokorahúyansabé Épárásiga Sísá Karáhéne sansá kawerue íwáhnoruraire.

⁸ Wega teiena, Manikáne Awanka séhréh aitarái puaq itega mó keyábé áhnte írútábóírowe uraire.

⁹ Wega teiátáitaqkákáq menahnkákáq amahnágaákáq itensabé púreraitaráúye. Ite íre túbáh agia peh ahriahri púreraitaráúye. Manikáne Awanka awahbeh iwíáh wene sánsá iahtebageheéta púreraitye.

¹⁰ Manikáne Awanka mirainaraq ite ahte bia ké tábúsoqme íráh ké míagehe. Minayabe wega mirainkeheéta itensabé púreraitye. Iahtebehrataq Maniká awahbeh sansá miraéq kaweqtaq mía míaorahowe. Itega áhnte kawéq árámbehri mirao-rahéq Maniká tábúsoqme tagariagehe.

¹¹ Íre kaweq sunúq sínaraq ite uwaresa ánimárí tabasíwe míageheéna Maniká págege aní púana wega ite págege aitéhre. Wega ite séhréh aitená págege aitankeheéta itensabé púreraitoye.

¹² Ite págege ánimárí méq itene irupipeq eyoyóue Maniká Iteribonsabé kaweróne atáhiro. Manikánka wahnahnirabeq téhrehrabeqme áhnte kawéq náneq kéhre. Mókake ite wene animárí mibeq méq mi kawéq náneq meyageheéna Manikánka aiq kawerairáire.

¹³ Sunkíkírirabeq owainawanka saiqnari-arairabeqte Manikánka ite meiqmena wene arunáwí áhnínkáwágá wahnahnirabeq móítaráire.

¹⁴ Sísaga miraúnsabe Manikánka itene ahababáq kaqiuwena insahwé aitéhre.

Poraga Sísá Karáhé éhweh pahqsuo ehwéhne.

¹⁵ Wehukega Maniká íre tagahrahúne. Sísá Karáhéwé Maniká tahnsa aní míéhre. Téhwe Sísá Karáhé ména moke miraro naneqmarí kiotaikéna wahnahnire.

¹⁶ Wega moke íópeqté náneqkakákáq mah marákóípéqté náneqmarínkákákáq mirarowe. Moke ábóraq kéh náneqmarínkákákáq kopípéq kéh náneqmarínkákákáq mirarowe. Wega moke íópeqté kéné wahnahmarínkákákáq moke anotah wahnáh ánimárinkákákáq moke págege naneqkakákáq omaq sitowe. Wenahninká moke kéh náneqmarínkákákáq wahnahninkeheéna Manikánka, Miraúno atowana mirarowe.

¹⁷ Moke miraro naneqmarínkákákáq íre kotaq Sísá Karáhé míowe. We íre míéhtáq tahirímé moke kéh náneqmarínkákákáq apubúue taqnobagi irino.

18 Sísá tagariona ke moráénue wene anonka tahnsá mionana wega wahnahnaitena itene iyahqno tahnsa miéhre. Sísá Karáhé mía míainsabé moke ite we tagariona ke oga mía míaorahúne. Sísá pukéna we ebeq oganúkú púaq anehe ite moq oganúkoneheqmúne. Oganúkúnsabe moke ite kiotaiqme ména wahnah wahnahnire.

19 Manikánka iwiáhúnka abowá mía míainserah wenahni moq mía míaire.

20 Wenahninká miraúnsabe Manikánka, Íné moke kéh náneqkakáq kaweraritanauge íwiáhúwe. Sísá awankátaq táhpague pukútaq wene korahq tunsabe Manikánka itene iru ukiq itéhre. Iru ukiq itena moke mah marákóipéqté náneqkakáq íópeqté náneqkakáq kaweraraníe íwiáhúwe.

21 Menah ite Manikáne naruo anímáí méq wensabé iuwahriehre íwiáhéq ahabábq iwiáhue ahabábq aruqarururowe.

22 Sísaga itene ahabábqnsabe awankátaq pukúnsabe Manikánka amahnága ite insahwé aítaráire. Wega ite íre ehweh aitanieéna insahwé aítaráire. Ite íre ahabábária peh weba kaweqtaq mía míaigeheéna insahwé aítaráire.

23 Sísane kaweq ehwéh teri terininkeheéna íné Pora eqmaq núwátáire. Mah kawéq éhwéhmé mah kehiná kéhíná teri terinúne. Mah ehwéhmé ambubu atawéq sehgióro. Kaweq nahnká íre míu míuia peh págegeue kagainserah mó ehwéhnsabé itene irupipeq iwiáh kikiriyehboq Sísá éhweh ambubu atíáhro. Mah kawéq éhwéh írátótaq itega, Oga mía míaonehe íwiáhowe.

Poraga Kórósia ke séhréh arito ehwehne.

24 Ite séhréh aitaráunsabé níwíoqnahwe. Minayabe nirupipeq íre umehia peh eyoyóire. Sísá tagaríáh ké áhnte úkéq kaweqtaq míageheéna arambehriunsabé níwíoqnahwe. Ite Sísá tagariona ke moráénéq wene anonka tahnsá míone. Wene anonka tahnsá mionayabé wehukega níwíoqnahtaq Sísá Karáhé moq áwíoqnahwe.

25 Ite kaweqtaq míageheéna Manikánka, Sísá tagaríáh ké séhréh arito aintaráire. Aintaráirana arambehriéna Manikáne ehweh moke pahsuqme teri terinuge.

26 Naho naho Manikánka wene epéqté éhwéh íre teriasa peh amahnága wene animarí teíre.

27 We awahbeh sansánéna naho íre teriasa éhwéh amahnága ite nahnso kereq itereq teíre. Mi epéqté éhwéhmé mahraréna, Sísá Karáhé itene irupipeq míéhana moke Manikánka wahnahnirabeq áhnte kawéq náneq kéhrabeq seneherawoe íre. Mi ehwéhmé anotah kawéq éhwéhnká ite ómi kehiná séhréh aitahtáhi éhwéhne.

28 Moke mah kehiná kéhínánká irageheéna we éhweh ómi teri terinuge. Ómi íráh kégá Sísá Karáhéne sansá ahtebéra kawerue miraigeheéna tábúsoqme síwáhnoréna kawerue miraoro éna pagu pagunuge.

29 Ínéga kawerue mirainkeheéna Manikánka anotahtaq págege aintéhre. Págege aintéhnká áhtetaq arambehri aruqaruruge.

2

*Manikánsabe aiq pútare ateq péhe éhwéh saiqnaru-
anéhe i éhwéhne*

¹ Itereq Áráórísia suwahpeqte kéreq mó Sísá tagariáh kéreqka néne niuranabiahtapeq íre tagarowe. Itega Sísane sánsá ahtebéq kawerue miraigeheéna áhntetaq arambehriuge. Minawé íráhro.

² Manikánka itene irupipeq kaweq iwíáh aitankeheéna arambehriuge. Mó kereq iteitereqsabé wensabé wensabé irutaboirigeheéna ite aiq pútaq ehwéh kawerue ahtebageheéna arambehriuge. Manikánka naho íre teiasa peh amahnága teí éhwéhmé Sísá Karáhé éhwehne. Minayabeákáq Sísaga miraorahi sansánkákáqsábé ahtebageheéna teiúge.

³ Késiipéq kaweq mensáméhnás kopípéq kéhnserah Manikáne ahtebia sánsámé Sísaba kéhre.

⁴ Mó kegá péhe éhwéh kawerue teiraq aiq pútare aritéhoéna teiúge.

⁵ Ínéga iteba íre mía míaugana peh néne iwíáh iteba kagaire. Sísá Karáhéne sánsá ambubu atawéq moraráq kawerue miraonsabé irena nirupipeq eyoyóire.

Sísareq mía míaéq oga mérapeq awaqme ehwehne.

⁶ Itega Sísá Karáhénsabe aiq pútare ateq we itene Wahnah mía míai puaq we kéraneheqmúne iwíáhurowe. Itega mira iwíáhuronserahnoro. Ahri-ahri wereq mía míaoro.

⁷ Íwáhnoruro sánsá kawerue iahtebahro. Anotah awánkánká áhnte anúq kéná págegeue kagainserah itega Sísá kawerue tagariagehboq weba mía míaoro. Págege marákórátq piéhra nahnká íre míu

míuia peh kaweqtaq kagainserah mi sansá ambubu atawéq mira aruqaruroro. Mira aruqarurirataq Manikánsabe iwíáh iwíághoro.

⁸ Péhe éhwéhnsábé aiq pútare aritéhboq kawerue iwíáhue tagariághro. Íre Sísá Karáhéne sansá peh wehukene iwíáh ehwehmé, abehq éhwéhmé, itene igaqnaréhne sansánsábé éhwéhmé, owainawamariné sánsánsábé éhwéhmé teírataq mi éhwéhnsábé aiq pútare aritého.

⁹ Sísá Karáhéwé wehukení úkéna Maniká Wenabo tahnsanéna abowágá inserah moke mirarahire.

¹⁰ Ite wereq mía míaúna puaq kaweqtaq miahrahéq oga mía míaúne. Wega moke mó wahnáhmáí kiotaqme wahnahnire.

¹¹ Itega Sísá tagariáh púaq Manikáne aiq pútaq sansá miraorahowe. Íre itene inonka amurúruyabe peh itene irupipeqté áhbabáqkákáq abehq iwíáhákáq sueq kaweq sansá miraorahowe.

¹² Ite Sísaba mía míaéq wání merowe. Itega weba mía míaonsabé sega Sísá maisatotaq ite moq maisatowe. Manikánka Sísá iriwe oganúq atonsabe aiq pútare atáronsabé Manikánka ite moq iriwe oganúq ítáráire.

¹³ Manikáne ehweh íre írátótaq ahbabáqka ite saignariaraire. Saignariarairaq peh ahbabáq aruqarururonsabé ite pusa ké tahnsa miarowe. Ite Sísaba mía míaúnayabé Manikánka itene ahbabáqsabe moke insahwé aitena oganúq ítáráire.

¹⁴ Wega sehgióro ú sansa itega íre sehgiráúnayabé itene ahbabáq áhnte káráire.

Manikánka mina sehgióro ú sansa Sísá pukú awánkátáq táhparó púana mi sansá parabaruowe.

¹⁵ Mitaq Manikánka moke owainawamarínseq sene wahnahmarínseq kiotaigme ména se saignaruowe. Saignéna anotah wahnáh ánínká karábúsiipéq mórítéhra ke sabironserahnue sabirúwe. Sabirúwara we míorabeq se abehq náneq tahnsá úkuwara ómiga tagowe.

Itega Sísareq pukowanana sehgióro ú ehwehnká íre séhréh aítahráhire i ehwéhne.

¹⁶ Minayabe itega táhutahuqkakáq wánínkakaq íre awehrionsabé mó kegá ehweh aitého. Ábáhré tanahráqmé, íó serariéh tánáhráqmé, ahrena ahrena wehekáhmé sega miraoro íra sansá íre mirairataqmé ehweh aitého.

¹⁷ Minawé peh mókake sína nanegsabé peh mánkánah tahnsá míre. Sísá Karahéwé aiq pútaq aní míéh púaq tagagehe.

¹⁸ Mó kegá itensabé, Peh morá awehríó kewé íópeqté kényábé íwíáh íwíáh arítáh kéwé sensiwanka áhntetaq tagah kewé mó ke kiotaikowe teigéhe. Segá mi ehwéh aitéhransabé íre íwíáhoró. Mi ehwéhme peh wehukeníné ehweh puaq íre aiq pútare arítáhró. Mi ehwéh irare kegá seyega íwíáhéra ite ahtebia ké úne éra píribahriowe.

¹⁹ Sewe Sísane sánsá íre ambubu atíáhwe. Sísá tagariona kewé wene anonka tahnsá mionana wega wahnahnaitena itene iyahqno tahnsa míéhre. Itene inonka onkakaq onunkakaq kéh púana itene inonka págegeue kéhre. Minayabe Manikánka séhréh aitéhraq ite Sísá tagariona ke wene anonka tahnsá méq anonúkúne.

²⁰ Sísá Karáhéga itene ahababáqsabe pukútaq owainawamarí kiotaikú púana sega ite saiqnaríórabeqte sabiiuowe. Minayabe itega mah marákóipéqté abehq sánsámé aneqsabé miraoo? Aneqsabé wehukega teié sánsámárí sehgioo?

²¹ Peh wehukega itensabé, Mahna íre táhtoro. Mina íre nahro. Mó naneq pehragahro eme aneqsabé sene ehweh iraho?

²² Segá irare naneqme íre kagaorahi naneq puana parabaginawire. Minawé peh wehukega iwíáhue sehgióro e sansáne.

²³ Mi ehwéh sehgió kégá, Kaweq sansáne iwíáhowe. Mi sansá sehgió kégá iwíáhéra, Mó sansámé kaweq iwíáh iwíáhé sansa míre. Mó sansámé uwaresa sánsá míre. Mó sansámárimé inonka kaweq wahnahnorahi sansámárí míre ewe. Mina pehragahro e ehwéhnkáwé, mah marákóipéqté abehq sánsámé íre séhréh aitená saiqnaruahrahire.

3

Sísareq moraráq irigowana ehwéhne.

¹ Ite Sísá Karáhéba mía míaonsabé Manikánka we iriwe oganúq atotaq ite moq iriwe oganúq itowe. Minayabe Sísá Karáhé miéhrabeqte sánsánsábé irutaboiroro. We íópeq Manikáne ayah púpeq tútuue ména wahnah wahnahnire.

² Mah marákóipéqté sánsánsábé iwíáhéq irutaboiriyehboq peh Sísá miéhrabeqte sánsánsábé iwíáh iwíáhue irutaboiroro.

³ Sísá pukútaq ite moq wereq pukéq amahnága wereq Maniká Iteriboreq kopípeq moraráq

míáhwe. Minayabe Sísá miéhrameqte sánsánsábé iwiáh iwiáhue irutaboirono.

⁴ Sísá Karáhéwé itene ogamé áwahe wíre. Wega kaweq tehreh naneqkakáq tuinagake itega moq wereq tuigéhe.

Ite o ke úkurauna ehwéhne.

⁵ Minayabe itene irupipeqté áhbábárorahi iwiáh súáhro. Mó aniné ahre ahrari weh mahbi abarié iwiáhwé, íre kaweq iwiáhwé, ahbabáq sansa sehgie iwiáhwé, mó aniné ménsámehnsánsabe aigará pabeki iwiáhwé súáhro. Mó aniné ménsámehnsánsabe aigará pabekime, minawé péhepehe manikánsábé iwiáh iwiáh atáh sánsáne.

⁶ Mina tahnsa ahbabáronşabé Manikánka anotah abíáhnsá aritena kamah arinawíre.

⁷ Menah iteitega mina tahnsa áhbábáq mira aruqarururowe.

⁸ Amahnágawé mina tahnsa áhbábáq sánsá moke súáhro. Taonsahwé, abiahnsa atewé, mó aní ahbabáq atewé, mó anínsábé péhepehe ehwéh atewé, ehbome, mina tahnsa áhbábáq sánsá moke súáhro.

⁹ Itene irupipeqté áhbábáq iwiáhwé, ahbabáq sansamé airaiq súáhnsábé wensabé wensabé péhe éhwéh teawíiyeho.

¹⁰ Itega o ke úkurowe. Manikánka ite kaweq iwiáh aitowaq itega we tahnsá kaweq ke mía míaiagehe.

¹¹ Sísane sánsá mirao kewé peh morá ké tahn-sane. Káríki kewé, Asiu kewé, síu amurúrúáh kewé, síu íre amurúrúáh kewé, mó ehwéhnikákáq irare kewé, mó sansá mirao kewé, mó kené aram-behriraq saiqnariáh kewé, arambehriyabé ápeq meyáh kewé, moke mina tahnsa ké Sísane ehweh sehgiówe. Sísá Karáhéga moke mina tahnsa kéné

sirupipeq mía míaire. Segá wereq mía míaconsabé sene sirupipeq mía míaire.

Moke mó keyábé irutaboire sansa sehgióro i ehwéhne.

¹² Manikánka itensabé arutaboirena wene kaweq ánimári míageheéna omaq itaráire. Minayabe teínserah sansánue míáhro. Mó keyábé irutaboire sehréh arítáhro. Ite iuwahbeh naneq iwíáh sueq mó keyábé siru ukisiteq uwaresa ánimári míáhro.

¹³ Mó kegá íre kaweraitéhrataqmé peh uwaresa ké míáhro. Itene Wahnahnka itene ahababáqsabe íre iwíáhue ahrreraq matíéhre. Mina inserah itebaqté ánínká are ahababáratahnaraq wene ahababáqsabe íre iwíáhue ahrreraq matiahno. Mó keyábé irutaboiro sansánká moke mó kawéq sánsámári kiotaikire.

¹⁴ Moke mó keyábé irutaboioro. Mah sansánká moke mó sansá kiotaikéna moke mó sansá págege atena sehréh atéhre.

¹⁵ Sísá Karáhéga itene iru ukiq itena peh morá iwíáh aitaráire. Minayabe ite iru ukiqme míáhro. Iru ukiqme méq peh morá ké tahnsa míageheéna omaq itaráire. Minayabe ite iru ukiqme mía míaoro. Manikánsabe ahriahri iwíáh iwíáhue kaweróne átáhro.

¹⁶ Sísá Karáhéne ehweh itene irupipeq ambubu atawéq iwíáhue tagahro. Ite morání moránínue Sísane sánsá ahtebagehboq we kawerue teawíeq síwáhnororo. Ite igonkónirataq itene irupipeq Manikánsabe iwíáh iwíáhoró. Buk Songipéqté ígónkónkákáq áróturapeqte ígónkónkákáq Manikáne

Awanka iwíáh atahna igónkónkákáq igonkónéq itene irupipeq Manikánsabe iwíáh íwíáhoró.

¹⁷ Sísa itene Wahnah míéh púaq moke miraira arámbéhrí kawerue miraéq moke irarira ehwéh kawerue irarero. Mirairataq Sísa itene Wahnah áwírue Maniká Iteribonsabé kaweróne ateq wensabé iwíáh íwíáh atáthro.

Poraga Sísa tagaríáh káíró ánínsabé irari ehwéhne.

¹⁸ Ahrerono, iteruwehqstone ehweh kawerue íráthro. Minawé Maniká itene Wahnah awahbeh sansáne.

¹⁹ Weho, itene ahreronsabé irutaboiroro. Íre áyátehreh sah subóro.

²⁰ Animáríno, ite inoibone ehweh saiyoie-hboq kawerue íráthro. Minawé Maniká awahbeh sansáne.

²¹ Sibowárého, itene animárínká itene ehwehnsabé abiahnsanue anetaníbo íwíáhiyehboq pehipi íre ehweh arítáthro.

Wahnah kené ehweh kawerue íráthro i ehwéhne.

²² Mó kené arambehri keo, itene marakóipeqté wáhnáh kéné ehweh moke kawerue íráthro. Itene wahnah kegá ite kaweq arámbéhrí ánimári móe íwíáhigeheéq peh morá se míáhtáq tauntahunue arámbéhríwé kaweq sansápo? Írakaumo. Maniká itene Wahnahnka tagariéhnsabé wensabé áhreéq iwíáhue ahriahri kawerue arambehrioro.

²³ Moke miraira arámbéhríwé tauntahunue arambehrioro. Íre peh morá wehukega wahnahnsabé Manikánka moq wahnahni puaq kawerue arambehrioro.

24 Ite kiotaigme wahnáhmé Sísá Karáhé wíre. Itewe peh wene arambenhriúna anímáí múne. Wega mókake kaweq naneq oga mé apéq náinkéhe. Minawé tagaríáhwe.

25 Manikánka ahbabáq ani kamah awinawire. Wega moke wehuke peh morá sánsánéna tábúsoqme sainsuanawire.

4

1 Wahnah keo, itene arambenhri ke tábúsoqme wahnahnéq pehwehrue kawerarítáhiro. Iteitene Wahnah íópeq ména tagaríéhre. Minawé aig írátíáhwe.

Itega págegeue púreréq kaweq sansánoro i ehwéhne.

2 Púreré sansa túbáh agiyehboq ahriahri púreroro. Púrerirataq itene irupipeq taorahoieyehboq kawerue iwíáhue Manikánsabe iwíáh íwíáh atáhiro.

3 Itensabéákáq púreraitáhiro. Manikánka naho íre teiasa éhwéh amahnága íróge. Mó ke Sísá Karáhé éhweh koreriniboq Manikánka mi ahtápéqté ónsá sinkehboq púreraintáhiro. Mi ehwéh teri terinuraunsabé suwahriarai kegá íné karábúsiipéq méintárówana míóge.

4 Sísá éhweh tábúsoqme teri terime kaweq sansáne. Ínéga kawerue mirainkeheéq púreraintáhiro.

5 Sísá íre tagaríáh kegá itene sánsá tagahnsabé kawerue iwíáhéq tabasíwe míáhiro. Seba míéhrataq ahtebawe anímáí méq Sísane sánsá kawerue soki-gioro.

6 Ehweh irarirataq iwiáhue tábúsoqme ehwéhno. Mó kegá itene ehwehnsabé kasenirataq iwiáhue tábúsoqme teriéro. Minayabe iahtebahro.

Poraga téhraníte Kórósia kebá eqmaqsuo ehwéhne.

7 Ínéreq Tíkíkúsireqme Sísane itene Wahnahne arambehri moráráq miraurauye. Wegá mi arámbéhri kawerue mira aruqarurire. We áhnte niruní ání míre. Wegá néne sánsá teinkéhe.

8 Ite págege aitená mahtaq miraúna sánsá teinkeheéna eqmaraníe.

9 Ónésímaga moq Sísane arambehri kawerue mira aruqarurire. We iruí ání ména iteruwahrah aní míre. Werek Tíkíkúsireq iteba moráráq konaraq itega mahtaq moke miraúna sánsá sega teigéhe.

Poraga Kórósia suwahpeqte keyábé iroro i ehwéhne.

10 Ínéreq karábúsiipéq míoya aní Árisátákiga itensabé iroro ire. Páhnábásane anahnowané ani Máhkaga moq itensabé iroro ire. Menah ehweh teiátáunserah wegá iteba kínaq mehwéh ateq kirabooro.

11 Mahtaqte aní Sísasa we mó awíq Sásátaga moq itensabé iroro ire. Mi anímári Asiu anímári móe. Ínéga Manikánka wahnahnirabeqte arámbéhri mirautaq sebatáq ínéreq arambehriowe. Segá anotahtaq séhréh aintáhwe.

12 Épárásiwe iteruwahrah aní ména Sísá Karáhéne arambehri mira aruqaruréna itensabé iroro ire. Wegá ahriahri itensabé áhntetaq

púreraitéhre. Itega Maniká awahbeh sánsá iahtebéq ambubu atawéq kawerue sehigigeheéna púreraitéhre.

¹³ Áráórísia suwahpeqte kéreq Íérápórísia suwahpeqte kéreq itereq séhréh aitanieéna wega págegeue arambehrire. Minawé tagarawéna teiúge.

¹⁴ Árukawe niruní sótéh áníne. Wereq Témásireqka itensabé iro-ro éye.

¹⁵ Áráórísia suwahpeqte Sísá tagaríáh kéreq Nímbareq wene nahtapeq momiwí aruqaruro kereqsabé iro-ro terié-ro.

¹⁶ Mah pahsí sáhnsahwe parabarúéh-rataq Áráórísia suwahpeqte Sísá tagaríáh ké-gá sáhnsahigéh-boq síé-ro. Áráórísia suwahpeqte Sísá tagaríáh ké síú pahsí kiwewe sáhnsahwe tagah-ro.

¹⁷ Áhkípúsansabé, Itene Wahnahnka omaq atá-rái arám-béhrí kawerue miraue parabaruo teawé-ro.

¹⁸ Íné Poraga amahnága ínéné-ne niyahnkaratáté mah anéhété éhwéh sehiranuge. Karábúsiipéq miónsábé ahreraq matíáh-ro. Manikánka ite séhréh aitahráhire. Mirainkeheéna itensabé púreraitége.

Manikáne O Ehwehne
God's New Talk: The New Testament in the Awa
Language of Papua New Guinea
Nupela Testamen long tokples Awa long Niugini

copyright © 1974, 1997 Wycliffe Bible Translators, Inc.

© Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 19 Dec 2025 from source files dated 12 Dec 2025

9673cf68-887a-574e-9ac8-846469c86b12